

武林掌故叢編

西湖遊覽志卷十五

錢唐田汝成叔禾撰

南山分脈城內勝蹟

官署

巡撫都察院巡按察院巡鹽察院清軍察院布政使
司布政分司都指揮使司都轉鹽運使司杭州府杭
州前衛杭州右衛仁和縣錢塘縣杭州府儒學仁和
縣儒學錢塘縣儒學織造府吳山書院市舶司杭州
府稅課司武林驛鹽倉批驗所惠民局

巡撫都察院入裕民坊在通江橋東舊爲清軍察

院嘉靖二十六年以海寇擾越中設都御史提督軍務以此爲行臺

鎮東樓舊名保安樓總制新安胡公宗憲建萬曆十一年司馬銅梁張公佳允重建規制雄偉爲會城大觀張公自爲記

巡按察院在正陽門北元時置江南行御史臺歲遣監察御史二員分巡省地當時有兩察院一在按察司右紀家橋邊者名北察院守省御史居之一在朝天門外正陽門北者名南察院監燒緡鈔御史居之卽今所也國朝歲遣御史分

巡浙江則猶元時守省之職而按察使副使僉事與御史參舉吏治其初權等耳乃今重內輕外而激揚之權總歸御史矣

巡鹽察院在宗陽宮東舊爲太平興國傳法寺基南宋初普照法師建皇明正統三年遣御史巡視兩浙催督鹽課遂改寺爲行臺

清軍察院卽今巡撫都察院也舊爲三皇廟廢址先是清軍御史寓西天寺正德間改建於此布政使司宋南渡初爲殿司寨尋改安撫司治復改祕書省元至元間徙江淮行省於此總兩浙

福建江西四道并開元宮址廣之至正十九年
析福建一道置行省國初天兵平浙因元舊置
浙江行中書省洪武九年改承宣布政使司置
左右布政使參政參議十五年割直隸嘉湖二
府來屬屬府十有一州一縣七十五司內有紫
薇樓門外百獅池皆宋元故稱蓋紫薇中書省
之號而百僚師師亦宰相之法像也樓後有山
疊石蒼翠嘉樹森列乃元時丞相別兒怯不花
所治山下有松化石節理宛然枯枿也經歷司
照磨所理問所司獄司廣濟庫皆在司內

宋祕書省以藏累朝御著信史古書彝器名畫汴
京建於禁中紹興初寓法惠寺十三年始建于
此省內有右文殿祕閣國史院道山堂著作之
庭國史日厯所書庫寶庫羣玉堂席珍亭渾儀
臺其前有方等院 淳熙五年九月二十日孝
宗臨幸祕書省賜丞相史浩以下官詩云玉軸
牙籤煥寶章簪紳侍列映秋光宴開雲閣儒風
盛坐對蓬山逸興長稽古右文慙菲德禮賢下
士法前王欲臻至治觀熙洽更罄嘉猷爲贊襄
著作權禮部郎呂伯恭和云麟閣龍旗日月章

中興再見赭袍光仰觀焜燿人文盛始識扶持
德意長功利從今卑管晏浮華自昔陋盧王願
將實學酬天造敢刻明河織女襄又獻詩二首
云麟臺高柳識琨輿其記中興幸省初黃道再
傳天子蹕青編重入史臣書需雲下際君恩盛
晨露高張樂節舒若寫鴻猷參大雅定非周鼓
頌畋漁又云紫清丹極與天隣闔闢乾坤繫笑
顰獨爲斯文回一顧坐令吾道重千鈞先王舊
物參差見列聖明謨次第陳墨客區區感榮遇
豈知深意在葵倫 周公謹遊祕書省記云乙

亥歲秋監丞黃汝濟以蓬省句點邀予偕行予
於是具衣冠望拜右文殿然後遊道山堂堂故
米老書扁後以理宗御書易之著作之庭胡邦
衡所書曰蓬巒曰羣玉堂堂屏坡翁所作竹石
相傳淳熙間南安守取之長樂寺壁間去其故
土而背施髹漆匣以持獻曾海曾殂復獻韓平
原韓誅簿錄送官左爲汗青軒軒後多古桂兩
傍環石柱二小亭曰蓬萊曰濯纓曰方壺曰含
章曰茹芝曰芸香射亭曰繹志曰采良門采良
二字莫知所出登渾儀臺觀銅渾儀紹興間內

侍邵諤所爲精緻特甚色澤如銀如玉此器凡
二一留司天臺一留此以備測驗最後步石渠
登祕閣兩旁皆列龕藏先朝會要及御書畫別
有朱漆巨匣五十餘皆古今法書名畫也畫皆
以鸞鵲綾象軸爲飾有御題者則加以金花綾
每卷表裏皆有尙書省印防閑雖甚嚴而往往
以僞易真殊不可曉其佳者有董源畫孔子笑
魚丘子圖唐摹顧愷之洗經圖此二圖絕高古
李成重巒寒溜孫太古誌公展子虔伏生無名
人三天女亦古妙燕文貴紙畫山水小卷極精

士雷小景符道隱山水關同山水胡環馬陳晦
柏文與可古木便面亦奇餘悉常品不滿十焉
暇日想像書之以爲平生清賞之冠也

布政分司五曰管糧道在峨眉山麓曰杭嘉湖道
在朝天門外舊爲巡視都察院元時西天寺舊
基也延祐間西僧板特達降香普陀山過錢唐
建此曰金衢嚴道在太平坊舊爲鎮守府後宅
曰溫處道在本司儀門外曰甯紹台道在運司
河下

都指揮使司本元行宣政院也洪武三年置杭州

衛都指揮使司其時徐司馬以其故址開建八年改爲浙江都指揮使司設都指揮使同知僉事而王誠陳垣又拓大垣廨遂以前右二衛附焉其經歷司斷事司司獄司皆在司內

都轉運鹽使司在湧金門內本宋轉運司治也太平興國二年開署於鳳凰山雙門內熙寧間徙建今所職司漕輓訊訟牒諏民利病領郡縣學校應詔選士其權甚重鹽課特其瑣事耳元至正十四年改爲都轉運鹽使專掌鹽課國朝因之設運使同知副使判官經歷知事

杭州府自吳越王已前在鳳凰山下宋南渡取爲
行宮徙州治於竹園山淨因寺故址元時改爲
杭州總管府皇明改爲杭州府設知府同知通
判推官屬縣九經歷司照磨所司獄司皆在府
內其府治正廳元時扁曰宣化後堂宋時扁曰
簡樂洪武十五年郡守阮友竹扁曰思政嘉靖
二十一年郡守陳仕賢建別館於儀門之外扁
曰親賢宋有中和堂簡樂堂見廉堂聽雨軒恕
堂愛民堂承化堂三桂堂吏隱堂講易堂清明
平軒景蘇堂玉蓮堂香遠樓並廢 中和堂舊

在鳳凰山府治嘉定間安撫趙時侃建之以存
舊跡簡樂堂卽今後堂是也時光宗以太子領
尹奏書有訟簡刑清百姓和樂之語後二年郡
守胡與可乃撫簡樂二字扁於堂且丐御書司
業薛元鼎爲之記見廉堂咸淳間安撫潛說友
得璽書有足見廉能之褒遂建堂而扁之曰見
廉聽雨軒景定間安撫劉良貴建恕堂紹定間
安撫金天錫建愛民堂淳祐間安撫趙與憲建
承化堂三桂堂嘉定間安撫袁韶建吏隱堂紹
興間安撫張澄建講易堂卽吏隱堂也隆興初

陳輝改建清明平軒潛說友建景蘇堂景定間
安撫魏克愚建以文忠公嘗守郡有治績也玉
蓮堂亦舊府治所有後守重建於此魏克愚徙
之錢唐門外潛說友遂卽其廢址爲香遠樓高
出城表平挹西湖山翠橫陳芙蕖布渚香遠而
益清爲郡署最勝

杭州前衛指揮使司舊在錢唐門太平坊洪武八
年徙都指揮使司大門之左統五千戶所

杭州右衛指揮使司舊在泰和坊洪武八年徙都
指揮使司大門之右統五千戶所

仁和縣舊名錢江縣吳越時在梅家橋西宋紹興三年遷觀橋東招賢坊元初遷於府左皇明洪武初復遷招賢四年知府劉文以縣附府爲便仍遷府左乃元時錄事司舊址也宋有無倦堂
安敬堂

錢塘縣漢魏時在靈隱山麓平帝時更名泉亭尋復名錢唐徙錢湖門外唐武德四年避國號改唐爲塘徙錢塘門裏宋南渡後建景寧宮復徙紀家橋華嚴寺故址皇明洪武四年知府劉文徙於府右宋有畫簾堂勤清軒

杭州府儒學在運司河下府治之東宋初在通越門外鳳凰山之右紹興元年徙建於此并今府治皆淨因寺舊基也嘉定九年教授袁肅黃灝言於朝拓大之楊簡爲記紹定四年戶部侍郎余昉增置學田周端朝爲記元至正十二年燬於寇守臣帖睦烈思購禮佛寺之南得地八丈提舉王大本爲記二十二年又燬守臣夏思忠盡購禮佛寺地南北二百步東西一百六十步提舉楊翮爲記皇明洪武八年重新之永樂十八年火宣德初大理寺卿熊槩以上命重建正

統元年按察使軒輓增建號舍其制左爲大成
殿右爲明倫堂卽宋時養源堂也宋有八齋曰
進德曰興能曰登俊曰持正曰崇禮曰賓賢曰
志道曰尙志元減爲六又減爲四曰志道曰據
德曰時習曰日新今仍之後爲崇文閣卽宋時
稽古閣也俗稱尊經閣內有宋高宗御書易詩
書左氏春秋中庸大學學記儒行經解論語孟
子等篇石刻臨安府尹趙礪老於太學建尊經
閣櫝墨本閣上奠石刻閣下宋亡學廢元改爲
西湖書院皇明改仁和縣學後學徙而石刻從